

**FEDERALNO MINISTARSTVO RADA I SOCIJALNE POLITIKE
EKONOMSKO- SOCIJALNO VIJEĆE ZA TERITORIJU FEDERACIJE
BOSNE I HERCEGOVINE**

Broj: 03-34/19-2520/13
Sarajevo, 08.10.2013. godine

Z A P I S N I K

sa nastavka 96-20. sjednice Ekonomsko-socijalnog vijeća za teritoriju Federacije Bosne i Hercegovine, održane dana 08.10.2013.godine u 15 sati.

Sjednicom predsjedava gospodin Edhem Biber, predsjednik Ekonomsko-socijalnog vijeća.

Prisutni predstavnici Vlade: ministri Ante Krajina, Vjekoslav Čamber, Zukan Helez, Enver Bijedić.

Prisutni predstavnici Sindikata: Ismet Bajramović, Salih Kruščica, Rifat Mahmutović, Omer Sikira, Šaban Kadirić, Avad Bahto, Selvedin Šatorović.

Prisutni predstavnici Poslodavaca: Safudin Čengić, Mladen Pandurević, Edin Ibrahimpašić, Tomislav Slišković, Seid Kapetanović, Selim Babić.

Sjednici nisu prisustvovali: Nermin Nikšić, premijer Vlade Federacije BiH, Jerko Ivanković-Lijanović, Erdal Trhulj, Predrag Čović.

Osim članova Ekonomsko-socijalnog vijeća sjednici su prisustvovali: Zoran Mikulić, federalni ministar pravde, Dijana Ružić i Muhamed Pašukanović iz Federalne uprave za inspekcijske poslove.

DNEVNI RED

1. Usvajanje zapisnika sa redovne 95-19. sjednice ESV-a;
2. Informacija o rezultatima pregovora socijalnih partnera u vezi spornih odredbi Prijedloga zakona o radu;
3. Nacrt zakona o inspekcijama u Federaciji BiH;
4. Dokument okvirnog Budžeta Federacije BiH 2014-2016. godina;
5. Prednacrt zakona o policijskim službenicima Federacije BiH;
6. Nacrt zakona o izmjenama i dopunama Zakona o udruženjima i fondacijama Federacije BiH;
7. Nacrt zakona o unutrašnjem platnom prometu;
8. Informacija o raspravi delegacije Poslodavaca i Sindikata u vezi Opšteg kolektivnog ugovora za teritorij Federacije BiH;
9. Razno.

Sjednica ESV-a zakazana za 30.09.2013.godine u 14 sati bila je formalnog karaktera zbog nedostatka kvoruma delegacije Vlade FBiH, te je današnja sjednica njen nastavak.

Iz Dnevnog reda privremeno se povlači Tačka 5. Prednacrt zakona o policijskim službenicima Federacije BiH zbog spriječenosti izlagača da prisustvuje sjednici.

Također je data suglasnost da se Tačke 2 i 8. povuku sa Dnevnog reda, jer pregovori socijalnih partnera vezanih za sporne odredbe Prijedloga zakona o radu i Općeg kolektivnog ugovora za teritorij Federacije BiH još nisu finalizirani.

Sve povučene tačke Dnevnog reda biće raspravljane na jednoj od narednih sjednica ESV.

Ad. 1

Zapisnik sa predhodne sjednice usvojen je bez primjedbi.

Ad. 3

Uvodno izlaganje o Nacrtu zakona o inspekcijama u Federaciji BiH dao je ministar Federalnog ministarstva pravde gđin. Zoran Mikulić. U nastavku izlaganja predstavnici Federalne uprave za inspeksijske poslove istakli su da se ovim Zakonom podiže kvaliteta rada i odgovornost inspektora, uvodi se certificiranje inspektora, tzv. kontrola kontrolora, te se uvode službene kontrole koje predstavljaju novinu u zakonodavstvu.

Socijalni partneri iznijeli su brojna pitanja i primjedbe koje su se odnosile na nedovoljnu definiranost certificiranja inspektora, nedostatak odjela za stručnu pomoć koja bi djelovala edukativno i preventivno, nedostatak kategorije upozorenja prije kažnjavanja, nedefinirani vremenski rokovi, sankcioniranje inspektora, reguliranje njihovih plaća i plaće direktora, itd. Socijalni partneri smatraju da je zakon potrebno što prije donijeti, ali da njegovom donošenju treba detaljnije pristupiti i razraditi ga zajedno sa inspektorima, kako bi Zakon napravio dobar ambijent za suradnju i dao bolje rezultate.

Zaključak:

- **Ekonomsko-socijalno vijeće Federacije BiH podržava donošenje Nacrta zakona o inspekcijama u Federaciji BiH i prelaže Federalnom ministarstvu pravde da razmotri iznesene primjedbe i sugestije socijalnih partnera, te da se prije nego što bude upućen na Vladu Federacije BiH ponovo dostavi ESV-u na razmatranje;**
- **Ekonomsko-socijalno vijeće Federacije BiH predlaže da Federalno ministarstvo pravde, u saradnji sa Udruženjem poslodavaca Federacije BiH i SSSBiH, organizuje okrugli sto u narednih 15 dana radi poboljšanja Prijedloga zakona o inspekcijama u Federaciji BiH.**

Ad. 4

Dokument okvirnog Budžeta Federacije BiH 2014-2016. godina prezentirao je ministar Federalnog ministarstva financija gđin. Ante Krajina.

Predstavnici Sindikata primijetili su da ponovo nema usklađivanja neto osnovice sa porastom troškova života, kao ni povezanosti sa ostalim zakonima što za rezultat može

imati ponovo podizanje tužbi radi nepoštivanja istih. Također smatraju da je potrebno navesti koliko se npr. godišnje izdvaja za nevladin sektor, razna udruženja, stranke itd.

Predstavnici Poslodavaca da DOB treba jasno definirati kako i gdje smanjiti troškove, a kako povećati prihode.

Zaključak:

Ekonomsko-socijalno vijeće Federacije BiH je upoznato sa tekstom Dokumenta okvirnog Budžeta Federacije BiH 2014-2016. Godina.

Ad. 6

Nacrt zakona o izmjenama i dopunama Zakona o udruženjima i fondacijama Federacije BiH predstavio je ministar Federalnog ministarstva pravde gđin. Zoran Mikulić.

Nakon rasprave donesen je zaključak:

Socijalni partneri će svoje primjedbe i prijedloge na Nacrt zakona o izmjenama i dopunama Zakona o udruženjima i fondacijama Federacije BiH dostaviti Federalnom ministarstvu pravde da se razmotre i eventualno ugrade u tekst Zakona.

Ad. 7

Uvodno izlaganje Nacrta zakona o unutrašnjem platnom prometu dao je ministar Federalnog ministarstva financija gđin. Ante Krajina. Između ostalog je naveo da je tekst Zakona prošao javnu raspravu, da je bilo mnogo primjedbi i prijedloga od kojih su prihvaćene uglavnom one koje su došle od Agencije za bankarstvo Federacije BiH. Zakon, pored ostalog, predviđa i uspostavu Jedinog Registra Računa, analogno JRR u Republici Srpskoj.

Predstavnici Sindikata izrazili su skepticizam po pitanju prihvaćenih prijedloga Agencije za bankarstvo Federacije BiH i smatraju da bi ih bilo dobro ponovo razmotriti i ustanoviti da li oni idu u korist ove države.

Predstavnici poslodavaca smatraju da je ovo bitan zakon čije intencije su dobre, ali su neka od ponuđenih rješenja sebična i štetna, te da se zbog toga Zakon ne može prihvatiti. Smatraju da Centralna banka BiH treba da provodi kontrolu, pri čemu informatička povezanost ima ključnu ulogu.

Zaključak:

Ekonomsko socijalno vijeće predlaže da predstavnici Vlade FBiH sa predstavnicima Poslodavaca i Sindikata rasprave i usuglase sporna odredbe u Nacrtu zakona o unutrašnjem platnom prometu u narednih deset dana.

Ad. 9

Pod tačkom Razno, gđin. Avad Bahto podsjetio je da se predmet Poštanske banke BiH treba istaći kao pozitivan projekat, te da mišljenje o rješenjima treba dati i ESV.

Sjednica Ekonomsko-socijalnog vijeća zaključena je u 17:30 sati.
Na Kolegiju ESV-a bit će utvrđen dnevni red i datum održavanja naredne sjednice ESV-a.

Zapisnik pripremila
Snježana Kapić

Predsjednik
Ekonomsko-socijalnog vijeća
Edhem Biber